

DISPUTATIO MEDICA

INAUGURALIS

DE

# CHYLOSI VITIATA.

Q V A M

ANNUENTE DIVINA GRATIA

*Ex auctoritate Magnifici Rectoris,*

D. WOLFERDI SENGUERDII, L.A.M.

Phil. & J. U. Doct. illiusque in Illustri Academia

Lugd.-Bat. Profess. ordinarii, celeberrimi, &c.

N E C N O N

*Amplissimi Senatûs Academici Consensu & Alma  
Facultatis MEDICÆ Decreto,*

PRO GRADU DOCTORATUS,

Summisque in MEDICINA Honoribus ac Privilegiis  
ritè & legitimè consequendis,

*Publico examini subjicit*

BERNARDUS DE MANDEVILLE, Rotter.-Bat.

*Ad diem 30 Mart. horâ locoque solitis.*



LUGDUNI BATAVORUM,

Apud ABRAHAMUM ELZEVIER,

Academiæ Typograph. MDCXCI.

*Doctissimo Expertissimoque Viro*

D. D. MICHAELI  
DE MANDEVILLE. M. D.

apud Roterodamenses practi-  
co felicissimo, parenti meo ad  
aras filiali amore prosequen-  
do.

UT ET

*Illustri admodum facundissimoque*  
*Viro*

D. D. SEBASTIANO  
SCHEPERS. J. U. D.

Civitatis Roterodamensis Syn-  
dico, & à Secretis dignissimo,  
propter amorem erga me,  
semper colendo


Se & hæc theses inaugurales

D. D. D.

BERNARDUS DE MANDEVILLE,  
*Auctor & Respondens.*







DISPUTATIO MEDICA

INAUGURALIS

DE

# CHYLOSI VITIATA

THESIS I.



ogitanti mihi de materia quadam eligenda promovendis enucleanda, & defendenda præ cæteris arrisit chyli generatio læsa: tum quia malum ubique est maxime vulgare, tum quia plurimi graviores morbi ex hoc malorum fonte originem suam deducunt.

I I.

Læsa autem chylicatio practica in tres partes dividitur suntque hæ *βραδυπψία* seu concoctio tarda, vel imminuta, *ἀπψία* seu plane abolita, & *δυσπψία* seu depravata. Horum vocabulorum etymologiam quod attinet oriunda sunt ex verbo Græco *πίνω*, Latine *coquo*, eorumque primo præponitur *βραδύς tardus*. Secundo *α* privativo, tertio particula *δύς* in

compositione *malè*, *agrè*, *difficultèr* significans; hæcque tria concoctionis ventriculi vitia uno nomine *cruditas* appellantur.

I I I.

Sed, antequam horum chyloseos affectuum morbosorum explicationem aggrediamur, prius naturalem ejus statum examinare non abs re fore existimo. Alimenta igitur assumpta, dentibus masticata, saliva ex glandulis in os depluente permista, & musculis œsophagi deglutita ventriculo ingeruntur, ibique in liquorem quasi pultaceum, qui chylus appellatur, transmutantur. Hæcque actio ob id chylicatio dicitur, & ratione modi à veteribus coctio, à modernis fermentatio nominatur.

I V.

Causam hujus chylicationis primariam, veteres, calorem quendam ventriculo, ut ajebant, innatum esse credidere. Sed quia videmus pisces absque calore alimenta digerere, canes ossa, gallinas vitra absumere judicamus calorem ad explicandam hanc actionem minime sufficere. Ex enim eo qui solo in motu consistit nec unquam nisi gradibus differt, quis, quæso, explicabit illam in singulis fere animalibus, etiam iis, qui eisdem cibis nutriuntur, digerendi varietatem? Turtur, ut testantur omnes, hel-leborum, canis vitrum antimonii optime digerit sine ulla evomitione; ex quo manifestissime patet, causam illam digerentem, aliam esse in homine, aliam in cane, licet eodem pane nutritis. Præterea in febribus, ubi calor per totum corpus multum auctus est, ut appetitus est protrahitur, ita & coctio aut omnino abolita, aut certe multum depravata reperitur.

V.

Sic vice versa in fame canina, ut ibi appetitus est ingens, ita cita digestio, quamvis tamen calor tunc temporis auctus minime sit. Postremo omnia acida dicuntur frigida, appetitum tamen excitant, digestionem promovent. Sic & ex plurimis hypochondriacis, quorum ventriculus, etsi dicatur frigidus, sæpius avidissime cibos appetit, eosque cito digerit, clare probatur calorem hanc coctionem non efficere. Ex quibus omnibus existimo, sufficienter demonstratum esse calorem hujus operis causam primariam non esse.



## V I.

Remanet ergo; facultates enim jam ubique fatis expulsæ sunt, ut fermentationi adhæreamus, dicamusque ventriculo inesse succum quendam, qui instar fermenti pistorii alimenta excitat, ea-que fermentationis beneficio transmutat; succus hic naturaliter constitutus est acido volatilis temperatus, constatque partim ex Chylo in rugis ventriculi hic & illic remanente, partim ex spiritibus animalibus ibi è cerebro per vasa in ventriculum hiantia delatis. Fuere autem, qui illud fermentum è liene in stomachum deferri volebant: sed quia hi nunquam demonstrare potuerunt ductus aliquos esse, per quos talis succus ex liene in ventriculum deferri posset, merito illam opinionem rejicimus.

## V I I.

Succus ille ergo ventriculo contenta, jam antea quodammodo comminuta, & saliva deluta acida sua volatilitate incidit, penetrat, resolvit, & ad fermentationem promovet: posset hic quid sit fermentatio fusius explicari, sed de ea hic ex professo (nimis enim longum foret) agere nolens saltem hoc dicam. Fermentationem esse intestinum expansivumque motum in humido convenienti, & spatio libero, citra causam sensibiliter advenientem, factum cum totali, aut partiali corporis fermentati mutatione. Ut jam fermentationem hanc naturali modo procedentem sequitur bona chylicatio; sic è contra eam quovis modo læsam, læsa etiam sequitur chyli generatio & ut primum bona concoctio, sic alterum cruditas appellatur.

## V I I I.

Cruditas autem hæc dividitur in acidam, & nidorofam; acida est, quando alimenta abeunt in succum acidum, & non sufficienter volatilifatum; nidorosa vero dicitur cruditas, quando ea corrumpuntur, ut abeant in liquamen horridi saporis putrilaginosum, & nutritioni omnino ineptum. Causam proximam quod attinet horum vitiorum; hæc vel erit in ipso ventriculo, vel in ejus fermento depravato, vel in vitio assumptorum ali-

mentorū. Læsa chylicatio vitio ventriculi causas habet omnes ventriculi morbos, inter quas aliquæ etiam sunt secundariæ; ex procedentia enim cartilaginis ensiformis, verrucis ventriculo adnatis, renibus calculo afflictis per consensum nervorum stomachum inefficientibus, sæpius orta esse chylicationis vitia testantur auctores.

## I X.

Fermentum stomachi depravatur primo, quando non est satis volatile, sed totum constat ex acido nimis fixo, aut cum peregrino acore in stomacho corrupto. Nam, si respiciamus hypochondriacos, assumpta à fermento quidem prompte inciduntur, & dissolvuntur; sed, quia illud sale volatili ita depauperatum est, non procurat alimentis debitam, bonoque chylo necessariam fermentationem; sed è contra non solum assumpta minus convenientia non corrigit; verum etiam, quæ sale volatili abunde prædita sunt, acore suo nimis fixo in massam vitiose acidam transmutat; unde inprimis cruditas oritur illa, quæ vocatur acida.

## X.

Secundo læditur fermentum quando ex perverso motu peristaltico fit, ut bilis in ventriculum regurgitet ibique acidum fermenti naturale sale suo volatili oleoso debilitet; ita, ut particulæ ejus alias satis acutæ ad assumpta incidenda, nunc partibus bilis oleosis circumvolutæ sic hebetentur, ut ineptæ fiant ad penetranda, & dissolvenda stomacho ingesta, eaque ad sufficientem fermentationem adaptanda, incitandaque; & ex hoc affectu cruditas oritur nidorosa. Hisque de fermento in genere quæ dici solent absolutis operæ pretium erit medico speciales illas, quas quotidie observamus fermenti varietates, curiosius examinare. Abunde enim edocemur non tantum in diversa animalium specie; sed etiam in unoquoque homine fermenti illam varietatem conspicuam esse ratione cujus, ut variat appetitus, sic tota assumptorum digestio; ita ut ea, quæ unus avidè appetit, & hinc facillimè digerit, alius respuat, aut non nisi cum molestia concoquat. Ex quo sequitur appetitum indicem quasi esse.



esse monstrantem, quænam assumenda sint. Nam vulgo, quæ libenter assumuntur, facile digeruntur, quoniam illa, quæ appetuntur fere semper fermento stomachico sunt amica, eaque, quæ ipsi sunt amica, aliis ab eo facilius dissolvuntur, & ad fermentationem incitantur.

#### X I.

Hinc Hippocrat. nobis injungit in aphorismis; appetita inappetitis longe facilius digeri: quod etiam probatur fœminis, præsertim gravidis, pica, & malacia laborantibus. Tulpius habet observat: *lib. 2. cap. 24.* de gravida, quæ per tempus gestationis 1400. haleces devoravit sine noxa. Platerus in observat. refert de puella, quæ comedit cœpam buboni pestilentiali antea applicatam, etiam citra ullam noxam: quamvis dubitandum non sit, cœpam veneno plane fuisse infectam. Quomodo jam fieri posset? ut illa assumpta appetita, non minus noxia, quam horrenda ab illis sine ulla noxa digererentur, si non essent amica; & convenientia fermento stomachi. Et ex hoc etiam sequitur, consuetudinem ciborum hic multum efficere, adeoque ejus magnam medico habendam esserationem: Cum, & ipse ait Hippocrat. in omnibus morbis consueta, licet deteriora, insuetis licet melioribus, esse præferenda. Causas harum fermenti varietatum, quod attinet, vel sunt hæreditariæ, vel à diversitate spirituum, aut pororum, per quos segregantur, aut ab ipsis externis petendæ sunt; hocque sufficiat de fermento, ejusque vitio in impedienda ventriculi concoctione.

#### X I I.

Pergo jam ad alterum chyloseos vitium, nempe ex assumptis alimentis ortum. Peccant ergo 1°. assumpta, quando nimis copiose ingesta commode digeri nequeunt. Ratio est, quia unumquodque menstruum fermentativum debitam requirit objecti proportionem, in quod agendum est, si jam nimia ingeratur alimentorum quantitas, fermentum in tantum obruitur, ut eadem nec dissolvat sufficienter nec convenienter fermentando volatilifet: hinc fit, uti assumpta nimis copiose ingesta; postquam quid-



dem acceperere acorem fermentativum ; sed nimis debilem , ut hinc fermententur , abeant , in pastam crudam & acidam. 2°. Fermentum nimius potus diluit , diluendo hebes reddit , & alimenta in stomacho ita fluctuare facit , ut in legitima sua fermentatione impediuntur ; denique , quod non est omittendum hinc evenit ; ut fibræ ventriculi ita luxentur , & flaccidæ reddantur , ut digesta licet alimenta per pylorum commode expelli nequeant ; quo fit , ut ea diutius in ventriculo detenta corrumpantur , multaque pariant mala.

#### X I I I.

30. Digestionem turbat ciborum varietas ; quamvis enim fermentum stomachicum valeat varios admodum cibos dissolvere , certum tamen est , id magis ad hunc , quam ad illum cibum determinari , si ergo acida cum dulcibus , pingua cum macris simul ingerantur , & fermentum in hoc magis , quam in illud agat , necesse est , ut vitietur digestio , & oriantur multæ cruditates. Cum muco in ventriculo residuo , quod enim non bene digeritur vix per pylorum transmittitur ; unde cruda & acida illa mucilago tam fibras ventriculi nervosas , quam ipsum fermentum obruit. Quod ciborum qualitatem attinet ; certum est ex nimis acidis assumptis oriri cruditates acidas ; ex nimis pinguibus , nidorosas. Sic etiam in genere lædunt assumpta duriora , quæ sunt concoctu difficiliora ; ut etiam ea , quæ nimis frigida , humida , flatuosaque existunt. Causis explicatis , ut ordinem servemus , transeamus ad signa diagnostica , quæ hæc fere sunt.

#### X I V.

Ægri conqueruntur de stomachi dolore post pastum , de ejus inflatione , de ructibus continuis , ab assumptione ciborum 5. vel 6. horas durantibus , iisque proprium ciborum saporem repræsentantibus , sæpius de difficili respiratione quando dorso incumbunt aut ambulant conqueruntur : nunc facies rubore tingitur , nunc appetitus est prostratus , mucus in os è ventriculo ascendens provenit copiosus , præsertim tempore matutino. In cruditate acida laborantibus ructus sunt acidi , flatus plurimi & om-



omnia, quæ per vomitum ejiciuntur sunt pituitosa, viscida, & crassa, saporis, si gustentur, acidi. In cruditate vero nidorosa ructus sunt foetidi & horridi referuntque ægrotis saporem ovorum, & piscium corruptorum olei trixi & similium ingratorum per vomitum, ejecta aquosa, vel plane insipida, vel parum amaricantia sunt.

## X V.

Quo ad prognosin coctionis vitium, quod à causis externis excitatur, facile corrigitur: item, quod oritur ab humoribus ex aliis partibus in ventriculum delatis, facilius curatu est eo, quod ex ipso oritur ventriculo. Oportet tamen, ut in prognosi hic semper cautus admodum sit medicus. Si enim inveterata sit illa cruditas, affectus producit omnium gravissimos. Si ex ebriositate lædatur concoctio, malumque diu perseverat, metus est hydropis aepsiam, si non cito corrigatur, ut plurimum sequetur lienteria, quando enim fermentum stomacho contenta non incidit, nec ullo modo fermentationi adaptat, nullam aut certe parvam acquirunt mutationem. Cæterum ex cruditate acida oriuntur colica, cholera, diarrhæa, dysenteria, fluxus cæliacus, hæmorrhoidalis, tenesmus, &c. Imo aucta acredine, eaque per massam sanguinis distributa orientur febres tam continuæ, quam intermittentes, scorbutus, malum hypochondriacum & quævis hujusmodi. Postea acidum illud, jam corrosivum & ipsas artus arripit: ibique omnes arthritidis species procreat; denique causa esse potest omnium morborum chronicorum, qui ex obstructionibus viscerum mesenterii, hepatis, & lienis oriri putantur. Constat ergo, læsam hanc chylicationem affectum esse, ex quo, tanquam ex morborum oceano, cæteri affectus suam originem trahunt. Quapropter festinandum erit, ut aliqua huic malo remedia parentur.

## X V I.

In curatione ergo scopus sit; primo, omnes illas ventriculi fordes, mucum, & succos in stomacho hærentes, propter moram diuturnam acidos, & crassos remove. Secundo fermentum

tum, quantum fieri potest, corrigere, & in naturalem statum  
reducere ante omnia origo convenient vomitoria, inter quæ an-  
timonialia sunt cæteris præponenda: ut sunt vina emetica ex  
vitro antimonii, tartar. emet. mercurius vitæ; sed ante omnia  
præferenda liquida, quia pulveres, propterea quod rugis ven-  
triculi sæpe inhæreant, vomitum immanem pariant. In specie  
potest hæc præscribi formula.

℞. Croci metallor.

vel

Vitri antimonii gr. viij vel x nil enim refert  
si modo bene attendatur ad liquidi quantitatem: adde

vini Hispanici ℥iij in fortioribus ℥iij

stent per noctem loco tepido, mane colentur per chartam bi-  
bulam, sicque calide propinetur ægro, superbibendo post ho-  
ram, vel quando nausea sentitur, cerevisiam calidam butyro  
permistam: quibus sæpius addenda; ut vomitus facilius promo-  
veatur titillatio, plumæ anserinæ in fauces immissæ; & ut cum  
antimoniatis eodem modo cum mercurialibus procedi potest.

## X V I I.

Secundo loco sequuntur stomachum corrigentia, ut sunt  
radic. zedoariæ, enul. campan., calami aromat., singiberis,  
galangæ minoris, pimpinellæ, & præsertim radicis pirethri ad  
pauca grana cæteris stomachicis admista mira efficiunt. Inter  
cortices primi sunt aurantior., citri Winteranii &c. elixir prop.  
paracel., elixir stomachicum Minsychti, ut & illud Johannis  
Michaëlis, mastix etiam optimum est stomachicum nunc pro-  
pinanda sunt salia lixiviosa, & omnia præcipitantia, ut cha-  
lybs oculi canc. antimon. diaphoret. nunc volatilia, ut sal cor-  
nucervi, menthæ &c. & pro his omnibus præscribatur formu-  
la sequens.

℞. Rad. enulæ campan. ℥ß

Armoraciæ ℥ij

Herbar. menthæ

Cochler, A. M. S.

Cort. aurant.

Citri ana ℥ij

Se-



Seminis erucæ ℥j

Sal tartari ℥ij

Quæ concisa, & contusa includantur nodulo, cui superfunde vini mensuram unam, maneant in cantharo bene clauso, bibatque hinc æger quotidie bis terve haustum ad ℥iij. vel, si abhorreat à copioso potu, detur elix. prop. p., vel alius stomachici gt. xx vel ultra ex cochleari vini generosi.

### X V I I I.

Ubi vero peccat cruditas nidorosa; unde appetitus prostratus, & hujusmodi symptomata; subacida: ut succi granator., aurant., citri, vel, si fortius procedendum sit; spir. salis dulcis, nitri dulcis &c. conveniunt. Et præcipue quidem hæc præscribatur formula.

℞. Conserv. rosar. rubr. ℥ij

Spir. nitri dulcis q̄s. ad grat.

Capiant hinc post pastum magnitudinem castaneæ, vel circiter, vel utantur guttatim bis terve de die cerevisia spir. subacidis acidulata.

### X I X.

Quando autem in his affectibus intestina etiam participant de viscositate, nonnunquam prosunt purgantia per alvum, & hic optimæ sunt pullulæ sequentes.

℞. Pill. hier. C. Agar.

rufi ana ℥ss.

Sal. tartar. gr. iv.

Ol. cort. aurant. gt. j.

C. S. Q. elix. prop. par. vel syrup. absinth. F. S. A: Pill. esq. v. mane jejuno stomacho deglutiendæ. Vel deglutiat æger bolum ex hiera picra ad ℥ij, superbibendo cerevisiam calidam.

### X X.

Ultimo hic convenient topica, quæ aliquando non parum faciunt, & pro his sit formula sequens.

Ma-

℞. Mastich. elec. pulverizat. q̄s.

Insparge corio tenuissimo ad tegendam  
Stomachi regionem sufficienti, pistillo fervido agita, ut fiat  
emplastrum, quod postea illinatur oleo aliquo aromatico; ut  
nucis moschatae, cinamom., caryophyllor. &c. & apponatur  
regioni stomachi.

## X X I.

Plura qui cupit legat auctores celeberrimos, & pro captu  
excerpat efficacissima, inter quos chymici non sunt ultimo lo-  
co habendi.

## C O R O L L A R I A.

I.

*Fermentum stomachicum non fluit è liene.*

I I.

*Calor non est primaria chylicationis causa.*

I I I.

*Chylicatio absque ferment atione peragi nequit.*

I V.

*Dicere enim dari facultatem concoctricem aque ridiculum  
est, ac dari qualitates occultas.*

V.

*Fœtus in utero non respirat.*

V I.

*Calor est effectum motus.*

V I I.

*Quies est aque realis ac motus.*

V I I I.

*Bruta non sentiunt.*

## F I N I S.